

四庫全書

集部

欽定四庫全書

十五家詞卷四

休寧孫默編

梁清標棠村詞中

中調

臨江仙

初春

花市歌樓簾半捲六街酒碧燈紅家家行樂醉春風五  
陵年少何處繫遊驄小婦新粧蟬翼巧那知愁上眉

峰垂垂柳色夕陽中陌頭驚見悔却覓侯封

蝶戀花

秋夜

御袂涼生衣袂早雁宿沙洲處處開紅蓼月滿關河凋  
塞草一聲玉笛征人老促織催寒秋思好剪燭西窗  
嘆息知音少倚杖登樓恣遠眺白雲片片西山小

宋荔裳觀察招飲觀劇次阮亭韻

榆莢風清飄蜀纈水漲銀塘繞過清明節絳蠟金樽歌

未歇柳花檻外飛如雪  
舊事甘陵翻數闋今昔闌情  
優孟真奇絕絲管啁啾聲漸徹  
魚龍波底搖殘月

人日

紅日窺窗春意逗剪絲爲人戴勝  
今朝又睡起尚嗔人語驟曉粧無  
力東風透輕暖輕寒渾似舊笑問  
檀郎驗取腰肥瘦六博閨中誇勝  
手鬢邊不覺金釵溜

釵頭鳳

閨怨

簾櫳悄流蘇小熏籠斜倚香還裊歡方嫩愁來頓纖腰  
非舊湘裙爭寸褪褪 釵輕掉梅如笑銀缸生暈燈  
花爆春將近鴻無信天涯人遠金錢難問恨恨恨

一剪梅

閨詞

宛宛冰輪上畫樓聽罷更籌熏罷衾稠畫眉人是舊風  
流對面溫柔背面嬌羞 雙結燈花兩意投一晌低頭  
半晌迴眸玉貌烟冷睡還休倚了香篝褪了蓮勾

題畫扇

翠巘遙連起白雲嵐色當門樹影當門平坡如掌靜無  
塵何處閒人來訪閒人 茆屋匡床幾度春花鳥相親  
風月相親寒香一抹暗消魂雪意三分梅信三分

錦帳春

春暮

柳色搖金鶯聲如剪誰打疊春光成片落花風寒食雨  
想海棠睡晚重簾深院 何限離情這般消遣收拾去

韶光一半語東君留暮景把芳菲莫捲人歸非遠

蘇幙遮

寒食

杏花烟榆莢雨綠映平橋又見春如許油壁車輕寒食  
路細草芳樽邀取春光駐轉鶯樓歸雁浦柳外梨梢  
愁煞長亭暮天意也知離別苦片片輕雲遮斷行人處

漁家傲

雨後

小雨纔收風謾謾修篁交響闌干曲澄湛一泓瀉瀉浴  
酣睡足鳥啼疑傍山家宿 瀟灑閒階桐覆屋花開花  
落無拘束門外任他車馬簇人新沐鬢雲低映窗紗綠

閒居

朝霽窺窗三徑曉草堂晝靜聞啼鳥插槿編籬隨意好  
雲自到落英一任西風掃 啜茗攤書塵事少開殘黃  
菊寒催早蟻戰蜂園何日了青門道回頭不滿山人笑

醉春風



除夕

春色渾如昨，燒燭聞宵柝。追思往事總成塵，錯錯出  
岫間雲。忘機鷗鳥，那堪耽閣。三載甘蕭索，又被浮名  
縛。重來人事一翻新，薄薄爆竹聲中，屠蘇杯底且同  
斟酌。

行香子

登齋中小樓

霧斂高旻，樓敞無塵。捲殘霞恰受斜曛。俯凭飛檻，遠眺

城闌看花如繡山如沐草如茵  
綠窗窈窕碧樹繽紛  
傍朱欄怪石嶙峋奇書堪把濁酒重斟  
喜冬宜雪秋宜月夏宜雲

春日過中山雪海留宿唐城

古道斜曛野水孤村暫停驂  
頻叩柴門故人相勞握手  
開樽看三眠柳千畝稻一川雲  
抵掌高論酒罷燈昏  
問乾坤得失誰分塵纓堪濯  
三徑猶存是柴桑里隆中  
宅武陵津

錦纏道

初度

冰雪柴門寂寞歲寒時候跳雙丸懸弧今又風塵瀕洞  
人非舊刺得閒身浪逐烟波叟嘆種種顛毛不堪回  
首春釀熟好烹羔剪韭佳人翠袖殷勤且主盟花月漫  
說經綸手

江城子

書屋新成

蕉林新館舊槐風日初紅上簾櫳  
几藜床窈窕綠窗  
中曲曲闌干花徑小誰是主有盧鴻  
樓頭虛敞月溶  
溶淡烟籠遠山峰客至開樽隨分兩三鍾  
恩賜閒居容懶慢身外事任天公

千秋歲

長至泊廬山下

遙青縹緲彭蠡湖天曉葭管動陽回  
早香閨添綵線畫  
閣熏龍腦人何處樓船官燭寒相照  
星渚環山堞戰

壘埋荒草傷往蹟  
渾如掃爐峰煙未改  
鹿洞雲還繞  
濤  
萬疊月明一點匡廬小

柳初新

冬詞

晴簷飛雪簾櫳護翠被  
篆添香縷海棠睡足臉潮微  
暈  
釵落鬢橫斜霧紅上瑣窗  
如許惱侍兒催人匆遽  
纖  
手牽郎且住怯朝寒  
枕傍低語眉心頻蹙楚腰半解  
不  
盡怨雲愁雨欲起又同偎倚  
最難聽鸚哥聲絮

千秋歲引

除夕

客舍東風高城夜角燈火千家閉樓閣誰將物華粧點  
就偏遺旅况寒如昨頌椒篇屠蘇酒成差錯聞說笙  
歌歸院落聞說畫堂垂繡幕爆竹聲聲總蕭索浮踪滯  
留殘臘後音書悔訂春前約夢兒中枕兒上休忘却

瓜茉莉

未麗

正苦薰風早清芬細裊黃昏後覓枝尋葉翩翩夢影引  
惹動閒庭蛺蝶摘來綴寶髻瑤釵盈盈暗添笑靨花  
神有意巧批了風流牒新沐罷晚粧寧帖斜簪綠鬢恰  
宜襯芙蓉頰伴鷓鴣枕上粉脂融浹衆香國魂夢貼

魚遊春水

上谷立春

東風開曉市晴照金臺雲氣紫春來天上巷陌漸薰羅  
綺玉燭長調禁苑中錦鶉爭試看塵裏吹笛一聲畫樓

獨倚 三輔名城高起又見髻邊新燕子青幡兼過燈  
宵韶光信美閨人劃損釵頭鳳羈客愁傾樽內蟻歸夢  
如醒流年似水

東風齊着力

立春

郊外青幡盤中生菜人樂時康惠風布滿春水瀉橫塘  
競戲魚龍角觝朱樓上小婦笙簧映釵色剪花綵燕香  
裛羅裳 莫問鬢邊霜百年內能消幾個歡場黛眉巧



畫半醉倚銀缸肯負籤聲燭影酬良夜細語平章喜公道不分冷暖惟有東皇

十五家詞卷四

欽定四庫全書

十五家詞卷五

休寧孫默編

梁清標棠村詞下

長調

滿江紅

栢棠村賞牡丹

春草孤村茅亭立老槐如昨香滿院名花傾國臨風綽  
約三徑纔開佳客至一樽細雨同斟酌嘆十年宦海歷

風塵空耽閣 鐘鼎業波濤 惡林壑裏無拘縛 趨日長  
體健留連芳萼 屋角遠山青 欲滴溪邊釣艇魚 新躍者  
眼前世事謾關情 秋雲薄

題柳村漁樂圖用呂居仁韻

萬柳藏村人家住 白鷗溪曲但編籬 插槿結茅爲屋門  
外淺汀清似練 窗前抱膝人如玉 雨纔收蕩漾兩三舟  
衝波綠 堪對酒陶潛菊 宜嘯咏 王猷竹 羨漁翁 婦子  
何榮何辱 畫閣朱門 彫謝了 浮家泛宅 隨時足 只一竿

明月不須錢烹魚熟

夏日晉陵陸恂若過訪留飲

小隱柴荆有嘉客遠尋茅屋侵屐齒檻橫浮翠砌添新  
綠帝里舊遊蝴蝶夢田間今和漁樵曲幾年來世事似  
浮雲多翻覆槐風起涼生粟雷雨過花如沐且論文  
把酒更開棋局此夕莫愁銀箭急明朝又向紅塵逐問  
東籬菊綻可重來村醪熟

高司寇召飲園亭

司寇風流歸來築柳塘  
花屋簾半捲西山烟靄北堂綠  
竹洛下耆英年齒會翠眉低唱顏如玉  
論人間底事最關情芳樽綠  
敦交誼羞流俗憐旅客忘榮辱醉良宵  
燈火舉觴相屬已下青衫司馬淚  
寧堪重顧周郎曲願同君携手混漁樵  
何僕僕

悼亡

造物如何遽收拾鴛鴦牒  
早把香天粉井劫塵埋了初  
擬鹿門同載去那知更踏長安道  
到如今白首送青春

真顛倒 蜃市結風鬟  
裊午夢醒槐宮杳  
想定情良夜  
倚燈人小紫蟹黃  
英難共醉都堪暮  
作淒涼稿對西風  
獨立哭斜陽閒花草

壽敬哉宗伯

洛下樽開羨龍馬  
精神奕奕稱觴處  
西山佳氣南皮詞  
客曳履容臺興禮  
樂拂衣棋墅娛泉  
石傍晴窗紈素畫  
滄洲煙雲碧 斟法  
醞鵝笙炙紛舞袖  
烏衣集正小春  
時節肯教虛擲鳳  
羽朝回頻問寢  
蠅頭花底閒濡筆  
論

長安福壽更誰同君無匹

過黃梁夢有感

官柳參差消磨盡英雄多少問華胥遠近黃梁遲早仙  
侶已隨雲影去行人又上邯鄲道怪枕中日月一何長  
河山小 村市畔墟煙裊亭榭外殘荷老任開山汗馬  
閒花野草壁上痴人爭說夢那知醒裏多顛倒倩西風  
一夜捲空花都堪掃

舟泊滕王閣下

淅淅寒濤看百尺，蜃樓高結問此地。何年畫棟幾時明。  
月帝子閣空雲已散，詞人賦就名還揭。下長帆對酒數  
憑闌，江天雪。簾捲處，嵐光疊。霞影外，沙沉鐵。嘆樓船  
組甲當年，煙滅鷓首。淒清息雁度，波心澆。濤魚龍咽攬  
笙歌客，醉舊江山，鄉心切。

玉漏遲

閨思

篆烟消錦幄，愁中又聽漏聲催。早却罷殘粧，繡被暗生



寒峭想像前宵好夢刺瘦影蘭缸相照燈暈小雁鴻報  
到歸人猶杳 消息試探梅花待漏洩春光可同歡笑  
欹枕釵橫畫樓幾番慵眺一紙音書寄語問白髮近添  
多少奩鏡悄眉峰爲誰頻掃

瑤臺第一層

江亭讌集

萬里羊城今咫尺飛帆幕府留艤舟三水簾開珠箔幢  
擁清油海天烟暖瘴嶺客來一洗羈愁喜春早正紅生

亭榭綠滿汀洲 朋儔主人情重鳳笙龍笛夜啁啾尉  
陀臺畔田橫島外半醉江樓對蠻方節鉞把手處頭鬢  
霜稠轉歌喉問誰占星使到自神州

玉燭新

乙酉元日

雪晴開曙早看徧布王正條風拂曉輕烟麗日椒觴暖  
共說豐年佳兆春衣兒女喜得歲樽前頻繞山中臥擊  
壤清時追隨牧童村老 回思當日

先皇正頒賜天厨雲和縹緲大酺同慶陪鴛鴦每近  
龍顏歡笑孤臣無狀此際包容非小今何幸放逐滄浪  
尚安覆幬

水調歌頭

寄懷王敬哉宗伯

椒酒催殘臘綵勝鬪新妍回首青門分袂離別再經年  
遙想柳堂深處春夕燒燈嘉會酬和白雲篇記憶山中  
客頻爲寄魚箋香一縷書數卷只高眠當時忝竊師

門同學又同官君近

九重天上我在北潭池畔相望各風烟何日重携手身  
健且加餐

春夜郝雪海侍御自都門還過邸中

把袂東風裏斜日駐青驄携來天上春色慰我客途窮  
夜話舊遊燕市惆悵河山已邈聚散酒罇中抵掌論今  
古塵世幾英雄剪銀燭歌白雪調誰同憐君國士十  
載蓑笠尚飄蓬猶是當年河朔慷慨風流未墜領袖有

諸公且共樽前醉心事托飛鴻

滿庭芳

觀女伶演淮陰故事

絳燭清宵彩雲華館蠻腰細舞迴風嬋娟忽變繡襖染  
猩紅鎖甲艷分雪色兆螯小雙頰芙蓉擢瑜映將軍紅  
粉錦繖黛眉同登壇當日事衣冠優孟寫出偏工歎  
英雄佳麗一樣飄蓬飛絮落花舊恨誰憐取桃李春穠  
乘月夜衣香人面莫放酒盃空

寄酬申息盟

河朔才名傳家忠孝詞場共羨陰何故人紈扇贈我惠  
風多別後停雲一載遙山蟲馬服嵯峨燭天剪西窗雞  
黍悵望阻滄沱荆扉嘗晝掩老漁相逐雨笠烟蓑任  
世情翻覆衮衮頽波懸想洺醪已熟高卧處對酒當歌  
擬他日滄浪携手長嘯踏青蘿

立秋

茅屋三間槐庭一葉金風乍入繩床年年此際涼思滿

奚囊廿載黃梁夢境一撒手轉眼荒唐間消受幽花文  
蜨秋水玉簪香 商量喜計日東籬綻蕊紫蟹迎霜問  
誰家新釀早熟先嘗萬事休教掛齒驚魂魄利鎖名韁  
登高處遠山蕭颯孤雁度斜陽

中秋

細雨纔收浮雲乍斂西風捲霧初晴香飄桂子秋草滿  
閒庭入夜冰輪當午小樓外碧巘縱橫微茫裏萬家燈  
火樹色暝烟平 璣瑜紛舞袖紅牙按拍小婦鳴箏任

玉繩低轉客醉沾纓十載東華舊夢回首處心悸神驚  
趁佳節空明如洗坐待月華生

城南泛舟

城繞春流堤藏蕭寺人家半倚晴溪輕風暖日布穀數  
聲啼一棹船如天上關情處岸草萋萋空回首故園柳  
色烟景望中迷 依稀想此日清明近也桃杏開時歎  
蹉跎踪跡物換星移舉網鮮鱗入手開笑口聊醉春卮  
酒闌後斜陽駐馬目斷畫橋西



燭影搖紅

正月十四夜

綺戶輕寒千門不閉樓臺晚麗譙吹歇罷歲蕤九陌香  
塵滿何處簫聲近遠試華燈春風庭院閒身天許遊冶  
場中留連歌管暗想當年團圓兒女清宵宴翠眉低  
唱漏聲沈絳燭西窗剪此夕移物換頻搔首霜侵鬢  
短月明依舊火樹光搖星橋烟暖

帝臺春

春懷

晴日炙雪初消池水碧遊鯉負冰好鳥窺人間愁增劇  
追憶年時香閣裏携手看故山春色奈而今惱亂東風  
偏吹孤客 春猶昔渾暗擲人咫尺何從覓嘆陌上青  
青又生芳草薄暮綠烟如織湖海氣難一旦減兒女淚  
已千行滴漸近了花朝怕重提寒食

夏初臨

初夏

蔽日初槐啼花嬌鳥疎籬漸長新篁永晝人間薰爐細  
細焚香謾誇世路名場遠風波碧簟清涼蝶鬚墜粉魚  
吹蘋末鶯弄笙簧好書堪把苦茗頻斟湘簾半捲燕  
子飛忙香閨雙陸倦來午夢偏長小立斜陽映紗厨笑  
看殘粧耐平章無邊風月自在年光

孤鸞

壬子除夕

禁城喧熱正爆竹聲催漏銅風咽小閣孤燈往事向誰

重說春到何家庭院助新愁滿門冰雪枉有屠蘇歲酒  
恨椒花頌絕想五侯甲第歡無歇把龍笛鶯笙檀口  
吹徹那管寒衾薄有人兒淒切珊珊玉珂初動又趨朝  
曉雞時節試問明鏡裏添幾莖華髮

雙雙燕

感懷

蕭蕭易水問何事春來助人悽惻蘋香柳嫩妍景任教  
拋擲聊話卽山雨夕又夢繞潭園烟色紛紜身世多般

已見雁飛南北 誰遣頭鬚頓白怕縱有春風也難消  
得壯懷無奈說甚肝腸鐵石况聽高樓弄笛盼不到漁  
蓑消息試看陌草青青正是杜陵寒食

玉蝴蝶

崇村看牡丹

報道西村花發春風一夕香滿疎欄載酒携筇亭畔淡  
淡雲烟弄輕陰新篁院宇翻翠浪綠野平田草芊綿花  
名傾國蛺蝶踰躑 留連芳郊細馬紅粧垂袖一笑媽

然銀甲調箏幾多心事入眉彎豈相逢琵琶江上渾不  
讓棋墅東山耐人看斜陽松影倦馬知還

絳都春

上幸真定恭賦

霓旌羽葆看玉勒飛塵翠華臨早雨灑郊原風靜天街  
開馳道紅雲畫護龍旂曉黃衣是

聖人年少萬家環擁千官拜舞共瞻

奇表非小名城三輔人何幸得覩

天顏微笑獵罷長楊月色甲光寒相照殘星夜角營門  
悄思浩蕩村墟無擾雪中黃竹歌成爭傳

睿藻

萬年歡

元夕

午夜晴煙早六街燈火交侵明月春樹人家遙傍帝城  
雙闕迤邐鈿車成列暉羅袖膚光欺雪春山澹止水盈  
盈笑看簾幙風揭清絲淒切樓頭少婦鳴箏坐幽恨

難說白馬金鞭知向誰行遊歇舞榭酒闌燭滅戾門閉  
內筵重設空竚望薄倖歸來深閨眉翠雙結

念奴嬌

夏夜

涼侵疎簟看星河漸轉頻催城柝百合香勻新浴罷月  
照殘粧綽約紈扇初停冰肌無汗重試羅衫薄花陰携  
手一枝輕罨釵落聞道世態浮雲長安棋局俯仰成  
今昨人在瑤臺清露下消受藤牀珠箔橫笛笛高樓鳴蟬



滿樹塵事渾拋却西風轉眼又驚吹到簾閣

送家光祿兄北上

西山薦爽堪拄笏飄墜井梧一葉門外驪駒爭祖道分  
序雁行南北十載親闈兩悲風木種種顛毛白老成高  
臥靜看車馬心折 正逢乞巧針樓天孫會合惆悵人  
間別

主聖時清頌一出豈得久淹泉石事了拂衣功成身退  
早遂漁樵業雕丘無恙韓溪同泛烟月

遣興

十年京國空盪浪解組一身如葉浩蕩涼颭來木末霜  
滿滹沱河北俛首浮名驚心世路回想頭堪白書生傲  
骨腰圍寧使輕折拚取潦倒詞場醉眠錦瑟揮手紅  
塵別茅屋三間容膝了何必平泉奇石雨笠雲蓑閒花  
野草管領幽人業江山無盡莫教辜負風月

家光祿西廬習靜再疊前韻

繁華過眼看古今得失浮雲飄葉暑往寒來駒隙影早

見塞鴻辭北槐國無喧漁村高枕恐負洲蘋白東華翹  
首羊腸空嘆千折聞說重理蒲團再安丹竈不與家  
人別况有玉清堪共隱奚用受書黃石蕉露研朱松風  
啜茗勾當山居業他時出訪杖藜同踏蘿月

贈同年魏蓮陸併祝初度

紙窗茅屋有先生抱膝小門迴折荒徑全縈書帶草床  
上凝塵滿席五馬歸來三間高卧獨耐袁安雪蕭然環  
堵猪肝肯使輕說聞道初度佳辰墻頭過酒剪燭招

狂客萬事何如杯在手莫問新來華髮粟里琴樽龐公  
夫婦歲歲娛泉石故人寒邱夢留齋畔涼月

悼亡

啼猿聲裏正蕭疎一片霜天秋色絃續鸞膠看兩兩比  
翼連枝無別洛浦珠沈湘靈瑟冷刺有寒螿咽鍾情我  
輩那堪蘭蕙重折回首燈火春宵茗爐佳夕鴛枕偎  
猶熱留得零香餘粉在種就柔腸千結爲問飛瓊還歸  
天上可憶來時節蠶絲難盡夢回簾外殘月

壽退谷先生

聖朝遺老擁琴樽  
圖史婆娑清晝傳  
得闕閩當日學  
獨把殘編窮究道  
在斯人晴窗高卧閒  
却經綸手一庭風  
雪喜當介眉時候  
繞膝綵袖重重持觴共祝宰相山  
中久謝客著書多歲月  
小閣藤深松茂鶴髮丹顏憑烟  
雲好供養容如舊  
春風盈坐笑看車馬馳驟

念奴嬌 第九體

江行用東坡韻

吳頭楚尾挂長帆別是一般風物白浪排空天作壑界  
破東南半壁遠樹微茫遙峯斷續夾岸霜如雪烟波無  
恙消磨幾許人傑坐聽鼓吹中流候風回五兩棹歌  
齊發向晚推窗指顧中數點漁燈明滅牛斗浮槎鄉關  
回首處頓更毛髮空江渺渺憑闌涼轉新月

過綠柳長廊有感

滹沱南陌憶當年綠柳依依堪折夾道長條張翠幄清  
影寒生六月汗滴征衫塵飛驛路到此清涼別今來駐

馬濃陰一旦殘缺 聞道舊日隋堤春來渭樹空有蟬  
聲咽可惜長廊烟霧冷轉眼繁英銷歇莫問秋風樹猶  
如此何況三千髮長途搔首愁聽枝上啼鴉

舟發章門楊陶雲載梨園置酒叙別

江城如畫雪初晴渺渺長天空碧好友輕帆携酒到載  
得滿船春色吳下秦青新翻樂府橫吹寧王笛旅懷無  
奈茫茫對此交集 憐我海角浮踪逢君遷客相對頭  
堪白舞罷柘枝歌子夜攬起魚龍窟宅杜牧情多司空

見慣懊惱紅燈夕地鄰湓浦青衫今日重濕

大江西上曲

寄羅弘載越中

蘭橈畫槳嶺南舟共泛湖天寥廓髯容揚舸蘭渚去折  
柳勝王高閣江上登樓樽前擊鉢轉眼分今昨雲山千  
疊舊遊頓爾蕭索聞道戍堞烽烟戈船鼙鼓宛委軍  
聲惡當日應徐無恙否八口可安林壑阮瑤從軍陳琳  
草檄豈歎功名薄爲詢羅隱壯懷肯令飄泊



雙頭蓮

嶺南元夜

海外繁華看絳燭圓  
紅星毬初放  
蠻鞞錦障月影裏忘  
却鄉愁孤况  
暗想京國燈宵阻雲山  
千障春一樣紫陌  
香塵有無鈿車來往  
憑仗午夜笙簫把軍烽靜偃消  
除兵象江湖晚漲燒火樹粧點羊城尤壯聽罷白苧吳  
歎有周郎座上  
天萬里對酒當歌相看愜懌

桂枝香

中秋

西風簾幙看花影移階蕉陰綽約三五良宵正永小羅  
杯酌三年幸訂漁樵侶伴閒雲輕鷗孤鶴鹿門夫婦竹  
溪賓友柴桑籬落任清露涼侵袂薄對扶疎叢桂此  
景非惡漸斂浮雲夜半月臨虛閣庾樓人坐冰壺裏欲  
乘鷺飛向寥廓且拚盡醉休論塵世受他羈縛

海天濶處

贈越中羅弘載

謁來髯客江東樓船把袂波如練長篇短咏抽毫伸紙  
烏絲蠶繭七子菁英六朝金粉風流非遠任青鞋布襪  
窮關塞名山喬嶽遊踪徧行笈圖書數卷幾悲歌黃  
金臺畔探竒禹穴臨池蘭渚聲華早擅雪苑開樽旗亭  
觀伎詞場消遣問相如可有臨邛重客子虛誰薦

畫錦堂

送二兄

予告歸里

鴉亂斜陽林吹寒籟極目秋滿燕闌惆悵無端別緒又  
送兄還去逐平沙孤雁影何堪城闕菊花天

君恩重賜沐清時風携兩袖歸田 離筵樽酒外驪唱  
裏白雲遮斷家山憶昔驚濤駭浪共與迴旋喜看新結  
漁樵侶愧余猶滯鷺鷥班頻回首閒盡故園叢桂並隱  
何年

憶舊遊

雪中感懷

想秋原哀柳細雨瀟瀟魂斷河梁日月曾無幾早寒風  
朔雪吹到茅堂孤踪久辭雙闕誰識舊劉郎幸同好猶  
存悲歌對酒共說

先皇 草草思前事嘆物換時移空費推詳問菊松三  
徑奈暮雲縹緲難認柴桑梅香漏洩春信歸夢繞橫塘  
聽何處高樓一聲玉笛淚千行

綺羅香

十六夜

曉雪纔晴華燈再耀粧點春城如畫一刻千金欲買良  
宵無價曲闌倚檀口瑤笙六街騎玉鞭驕馬氣氤氳飛  
霰雕簷銀花釵色光相射 繡窗眉嫵試看似昔年京  
兆風流重話焰吐芙蓉處處酒旗歌榭橋邊女笑倩人  
扶笛裏梅落來堪把拋紅豆誰結同心趁蟾蜍漸下

春雲怨

閨怨

疎燈薄暮又一聲歸雁飛來平楚門掩東風塵生寶篋

流年驚暗度絲線慵拈燭花頻剪舊怨新愁漫空數卓  
氏孤吟班姬團扇無奈人耽誤王孫玉勒知何處把  
三星誓約翻雲覆雨去矣朱顏漸非故零亂飛蓬惱煞  
窗前鶯啼春樹夢罷闌山酒醒殘月極目淒涼南浦

春從天上來

壽蔡中丞

綺戶祥煙正身退功成部曲蕭閒豫章旌節淮海歌絃  
手持半壁江天問先生何事人未老偃仰平泉樂清時

羨賓朋北海絲竹東山  
松徑樂闌楚楚聽瀑布潺湲  
映帶竒巒花舞毬場雲凝金埒戾鯖法醞開筵戲斑衣  
進酒列棨戟七葉貂蟬醉醅顏殮梨舊事辟穀當年

喜遷鶯

夏日遣興

蕉林雨歇正寶篆香溫瓶荷芳徹  
棊几攤書湘簾伏枕  
愁煞利名場客消受薰籠茶椀  
閒度草間飛蝶最愛是  
傍蕭蕭疎竹林梢新月  
淒切關情處遠樹蟬聲又值



清秋節白墮三杯紅綃一曲說甚濟時豪傑小構數椽  
茅屋圖畫琴尊羅列且白眼任花開花落陰晴圓缺

壽芝麓宗伯

堂羅絲竹正葭琯灰飛春回寒谷江左風流東京部黨  
共識當年耆宿執法風生臺閣借箸禁中頗牧烽火靜  
向南宮曳履望高鈞軸 蒿目憂國處兩鬢絲絲欲救  
蒼生哭對客抽毫張燈擊鉢不數詞場潘陸歷盡險巇  
身健嘉日莫辭醞醪趨朝罷領鳳城烟月清宵顧曲

永遇樂

九日

籬菊凝霜井梧零露雁飛平楚何處秋聲小庭浙瀝無  
奈情千縷登高送目手把茱萸生受淡烟疎雨嘆良時  
幾年虛度總付東華塵土古今得失人生聚散渾似  
落英無數戲馬臺空龍山帽冷風月還如許閒拋書帙  
笑引清樽看取綠窓眉嫵莫更使愁蜂怨蝶香寒別浦

戲擬催粧

簾閣香溫藍田烟暖小春時節河鼓初臨天孫將渡鵲  
報人閒匹鳳臺許跨鸞膠重續自笑溫郎非昔對冰清  
人慚叔寶爭道門闌氣色鴛鴦翼並芙蓉綉隱珍重  
定情佳夕廡下齊眉五噫成咏舉案傳先澤鹿車共載  
丹崖偕老歲歲歡如今日好倩語新粧早試遠山黛碧  
花心動

元夜

上谷風和夜溶溶香車六街闌咽燈火朱樓絃管清尊

共賞太平佳節誰家少婦簾櫳裏  
喧笑語綺羅輕揭客懷亂  
敝裘獨擁小門殘雪閒把年時  
細說儘玉漏聲沈鳳簫吹歇  
桦燭春閨眉無紗牕蘭麝繡幃  
頻爇無端辜負鴛鴦夢郎山  
畔冷衾如鐵酒醒處星橋淡烟  
斜月

望海潮

鎮陽懷古

雄風河朔燕南都會名城古  
說中山帶遼溇沱屏開恒  
嶽連營劔倚青天主父故宮  
閒嘆霸圖灰劫鹿走邯鄲

壁返相如墳高頗收總荒烟  
軍聲成德當年有北潭  
舞榭趙苑歌絃菡萏送香菰菱映水秋來依舊爭妍哀  
草冷平原信陵立功後結客空傳戰壘烏啼笛吹闌戍  
夕陽寒

大聖樂

春閨

奩鏡初開流蘇乍暖啟窗猶寒引螺黛巧畫雙眉寶鴨  
頻添香篆裊裊輕烟纔換春衫慵出手向梅萼凝粧子

細看繡簾日永鶯花無賴珍重芳年 東風又到芳草  
漸柳色依依駐錦韉語金閨夫婿椒酒綵勝莫負清歡  
世事何憑韶華易去一瓣皈依大士前人無恙祝天長  
地久被底文鴛

過秦樓

吳城雨中

樹隱千章風輕五兩堤畔人家容與柴門照水沙岸連  
橋一片吳城烟雨遙望曉捲簾小婦凝粧映窗眉嫵

金剛經 卷五  
嘆天涯客子三千餘里雁沉江浦 空聞說白苧江東  
錦帆南國顛倒醉鄉歌舞寒林半落霜葉猶紅愁見鳧  
鷗孤嶼更羨高風此邦孺子荒亭雲卿黃土問江山萬  
古茫茫今夜夢回何處

霜飛葉

冬日寄懷杜子靜

小齋寒冽疎燈燼故人夢牽梁月貧交鮑管等輕塵嘆  
世情非昔極望裏五雲清切雙魚頻寄田間客者今古

茫茫問誰是市中屠狗西州豪傑 猶憶祖帳青門河  
梁抗手不數陽關三疊歸來松菊未荒蕪已自合鳩拙  
霸陵老豈因人熱當年對酒燕山雪悵離羣回首處碣  
石風高滹沱冰結

洞庭春色

次韻寄答松陵徐電發

獨步江東羣推孝穆志在千秋儘詞華潘陸恣情採擷  
新聲秦柳匠意研求入洛才人追二俊遇傾蓋公卿便



駐蹕吾哀矣者中原鞭弭輸與林邱 當年陳琳阮瑀  
草檄處名滿諸侯羨扁舟書劍五湖烟月春城絲管六  
代歌樓樽酒旗亭風雅會料此際歐陽放出頭西陵畔  
聽江潮怒發笑引吳鉤

歸舟

萬里河梁五羊歸權夾路春風者荔枝洲畔沉香浦外  
簾開樓閣帆動艨艟載得珠江花鳥去更千步香薰兩  
袖濃斜陽岸正袍青草綠衣染鶻紅 簾藏羅浮舊繭

早辨取舞蝶紗籠問踏歌蠻樂穿花遊女尋芳何地拾  
翠誰從拋却南天烟月暖喜北望長安紫氣重驪歌裡  
聽蘭橈笳鼓驚起麗宮

嶺南有千  
步香草

### 沁園春

#### 咏美人足

錦束溫香羅藏暖玉行來欲仙偏簾櫳小步風吹倒褪  
池塘淡埒苔點輕彈芳徑無聲纖塵不動蕩漾湘裙月  
一彎鞦韆罷將跟兒慢拽笑倚郎肩 登樓更怕春寒

好愛惜相偎把握間想嬌憨欲睡重纏繡帶蒙騰未起  
半落紅蓮笋印留痕凌波助態款款低回密意傳描新  
樣似寒梅瘦影掩映窗前

登望湖亭

潑灑湖光黛染遙山送目方賒喜紅亭俯立一天帆影  
白波東去幾縷殘霞方寸鄉心迢迢水驛愁絕風濤博  
望槎徘徊處有喧闐列肆煙火千家神祠擊鼓鳴笳  
想吳楚當年鬪麗華任青帘貰酒醉眠買舶牙樯吹角

驚起棲鴉橫梨雄才登樓客况消盡江頭野草花雲煙  
潤正臺連蛟蜃人侶魚蝦

賀新郎

蛟門納姬次芝麓宗伯韻

錦幄紅霞卷賦催粧鵲橋已駕青鸞先遣才子廣陵年  
尚少下直墨華猶泣奩鏡伴烏絲蠶繭携得御爐香滿  
袖正天孫初渡銀河淺京兆筆晴窗展 遠山肯使眉  
痕顯倦支頤流蘇低亞筠籠微扁吹罷鳳簫閒對奕亂

局須憑獨犬吟蟋蟀西堂愁免欲博琴臺人一笑解鸛  
裘好向壚頭典蓮漏永閒缸剪

元夜用顧菴學士韻贈蛟門

十里珠簾卷徧燒燈暗塵隨馬鈿車齊遣縹緲簫聲明  
月下更喜露華初泣寒猶峭春衣重繭花市歌樓牙拍  
按正御溝冰泮流漸淺火樹合星橋展 晚粧纔試笑  
蓉顯倚銀屏歸人未卜金釵劃扁門外錦韉何處客頻  
囑繫鈴小犬尋好夢香衾權免午夜大酺人競醉罷嚴

城魚鑰金吾典聽玉漏東風剪

九日

風雨開茅屋報昨夜東籬纔放一枝黃菊再度重陽柴  
桑里過酒隣牆非俗好受享燈青樽綠身健喜逢佳客  
至把茱萸仔細看何足貪漏永剪樺燭 高樓已縱登  
臨日最闕情遙峰疊翠澄溪抱玉老去悲秋蕭蕭髮魂  
夢偏宜鄉曲况幾陣霜鴻南逐天上故人頻勸駕奈山  
中猿鶴憐幽獨誰更解清閒福

玉女搖仙珮

暮春泛舟

長堤柳影綠滿東郊十里芳湖如鏡舉網烹鮮行廚載  
酒重續當年佳興風月誰偏領况主人情重肯虛妍景  
早尋取青鞋布襪正是姚黃魏紫相映無奈遇知心嬌  
小情癡勾人醕酏憑仗蘭橈畫槳簫鼓中流潑灑素  
波千頃韋曲勝遊旗亭嘉會今古風流堪並城角樓烟  
暝怎消得杜牧疎狂心性趁落日仙舟容與佳人拾翠

春將去也君須省好留待夜珠光迸





十五家詞卷五

欽定四庫全書

集部  
十五家詞卷六至八

詳校官內閣學士臣尹壯圖

侍讀臣孫球覆勘

總校官降調編修臣倉聖脉

校對官員外臣張慎和

謄錄監生臣官學詩

欽定四庫全書

十五家詞卷六

休寧孫默編

宋琬二鄉亭詞上

萊陽宋荔裳先生以文章名海內久矣乃人稱其登  
臨讌集之暇好為小詞甫脫藁輒為好事袖去尚書  
紅杏郎中花影之句恒津津人齒頰間云間讀安雅  
堂所載古文辭暨各體韻語絕似昌黎廬陵諸大家  
與建安開元時人不禁歎曰美哉泱泱乎東海之風

于鱗以後一人而已願以未得讀其詩餘為恨一日  
先生駐驂五茸得追隨杖履采蓴澱湖翫月九峯歷  
壽夢之遺墟吊平原之故館夕陽蔓草流水寒鴉相  
與徘徊不忍去於是出其奚囊中諸長調歌之多商  
羽之音秋飈拂林哀泉動壑不足喻其崢嶸蕭瑟也  
已而置酒名園銀屏絳蠟掩映於花榭竹嶼間檀板  
紅牙肉倡絲和先生復出其小令為曼聲歌之如新  
箏乍調雛鶯初囀尖佻新艷不數齊梁子夜讀曲諸

歌噫觀止矣湖海之作傖父辛劉閨帷之製衙官秦  
柳此真子建天人之才邯鄲生能不為之咋舌汗下  
乎余嘗謂之曰不朽之道人患其少公患其多豈欲  
占盡文苑諸家耶抑公以生平風波危懼跋胡躓尾  
者尚少而更將深造物之忌耶先生為之捫腹微笑  
而已雲間董俞撰

小令

夢江南

湖上早春

郎有約草草畫雙蛾  
行到西陵松柏下  
遊人爭似蜜蜂  
多偷眼送春波

其二

粧閣外一帶綠楊烟  
冶葉倡條今盡矣  
春來那得到三  
眠何處繫郎船

憶王孫

菊花有名二喬者  
一朵中紫白各半  
蓋異種也

前身曾喜嫁周郎近托柴桑處士莊姊妹爭如鬪草強  
效鴛鴦偷得徐娘半面粧

閨怨四首

絲絲嬌柳逐風斜  
曉日曛曛掩碧紗  
強起還慵理鬢鴉  
白楊花猶自多情入妾家

其二

越來溪上采蓮舟  
偷照蛾眉向淺流  
女伴相呼怕舉頭  
羨沙鷗飛去飛來只自由

其三

兒家門對白蘋洲  
夫婿經年事遠遊  
楊柳青青古渡頭  
恨輕舟不載郎歸載妾愁

其四

空房膽怯夢多訛  
長向花前斂翠蛾  
幽恨詩成嬾去歌  
背吟哦悶倚朱欄教八哥

如夢令

離情



剛到鳳凰臺上無那驪駒三唱願作博山爐魂逐沈烟  
遊颺羅幃羅幃高築愁城千丈

其二

織女黃姑月月偏受天公磨折正爾拜雙星薦地燕南  
越北新月新月乍缺乍圓似妾

其三

小膽空房多悻那更烏啼蛩嚏簾捲看銀河心與繁星  
俱碎紅淚紅淚長浸合歡翠被

其四

別後雲鬟慵整蛛網鞏囊金鏡羅襪步空階幾曲雕欄  
獨凭花影花影滿地月明清冷

長相思

吳門夜泊

大江東五湖東地主今無皋伯通誰人許賃春聽來  
鴻送歸鴻夜雨霏霏舫中寒山寺裏鐘

生查子

春閨

俱戲用  
藥名

別日杏初紅新來黃白瘦  
梔子幾時回驗取丁香扣  
兔絲蔓已長枳殼花開又  
結哽畫雙蛾青黛眉兒皺

夏閨

二月算當歸于今將半夏  
誰與醉菖蒲芍藥吹殘也  
啼鳥宿紗牕清淚珍珠瀉  
紅豆盡拋殘笑把林禽打

秋閨

涼夜正懸參貪看牽牛卧  
欲睡又防風故紙牕櫺破

欽定四庫全書

十五家詞  
卷六

五

曉起鬱金堂篆裊沉香盃纖手泛茱萸滿地黃金流

冬閨

人言歡欲來續斷危兒吠寒夜轉相思相思增五倍  
儂似款冬花心為檀郎悴十斛買香醪此夕因沉醉

暮春將半桃花始開

梅花開已遲却恨桃花晚把酒問花神何事今春嬾  
春風如畫工粉黛憑深淺花是女兒家遲早由他遣

鞦韆

僂僂蝴蝶衣窄窄檀香板纖體欲飛颺只恨春風軟  
春葱玉指柔香汗羅襦滿侍女笑相扶倩把雲鬟挽

點絳脣

劉峻度席上聽女郎度曲

子夜清歌隔簾疑在青天外瓊簫玉管莫把鶯喉碍

紗帽籠頭卸却殘粧戴嬌羞壞廣場無奈初學男兒拜

簡陸元見徵士

牧豎樵兒斧斤漸逼質管谷梅花有福逃入幽人屋

甫里先生邀我供茶粥頻來熟丹經同讀牀下眠麋鹿  
浣溪沙

題余澹心五十小像

白髮平頭五十人依然居士淨名身盟鷗狎鷺有誰嗔  
伯玉行年非已斷少陵垂老懶逾真冶城花月樂千  
春

其二

白髮平頭五十人洪厓拍手笑相親會湏騎鶴訪三神

為愛烟波來角里肯將名姓謁平津莫釐峰下且垂  
綸

其三

白髮平頭五十人布衣曾未染京塵往來求仲不嫌頻  
關鴨欄邊芳草合鳳凰臺上柳條春批風抹月葛天  
民

其四

白髮平頭五十人踈狂聊以樂天真四時佳氣在君身

桃葉渡頭雙槳在  
樵青歌罷調方新  
為君滿引莫遂  
巡

芳草

乍暖猶寒二月天  
玉樓長抱博山眠  
沉香火冷少人添  
殘雪纔消春鳥哢  
畫闌干外草芊綿  
幾時青得到郎  
邊

菩薩蠻

閨情

再用  
藥名



桃腮杏靨春風面  
車前馬上曾相見  
蟬鬢退鴉黃  
氤氳蘇合香  
淚光雲母慘  
絮絮燈心短  
螺黛麝蘭膏  
憑誰贈阿嬌

其二

天門東畔天涯遠  
摧殘苴蔻香痕淺  
懊惱不留行  
連敲砧杵聲  
細心挑錦字  
遠志儂愁記  
翠鈿共犀梳  
封題好寄奴

卜算子

榆莢錢

良冶讓天工不怕銅山匱鑄就青蚨億萬緡亂向枝頭  
寄鵝眼易飄零貫朽還垂地欲付新豐舊酒樓少箇  
開元字

其二

不見鼓洪爐但見泉刀瀉嫋嫋垂楊欲聘梅千萬春風  
價撒漫古城邊暴富田翁舍關草兒童撲滿輸一擲  
斜陽下

其三

宜向庫中藏却向林端挂蕩子東君不作家散作鶯花  
債 萬選繞叢懸赤仄連青靄滿地殘英誰主人賤把  
春光賣

其四

花作五銖衣偏被桃花晒女伴閒將歸信占恨殺無憑  
準 樹也有貧時俄看枝頭窘不信東風解愛錢一夜  
偷將盡

採桑子

贈歌者陳郎並東西樵

櫻桃時節櫻桃鄭改作崔徽奪得鸞鏡輕燕翩翩掌上  
飛紅牙按罷黃金縷卸却羅衣一段嬌癡羞殺西樓

穆素輝

是日演西樓傳奇

其二

燈前倦倚嬌無力臂作空牀重理清商一串驪珠繞畫  
梁暮雲朝雨今宵夢錯賦催粧何物王郎醉裏溫柔

更有鄉

舟中見雁有感

今春曾送回鄉雁欲賦歸歟欲賦歸歟為報閨人掃敝廬  
今秋又見南飛雁歲聿其除歲聿其除却悔今春枉寄書

梅花

試將風格閒評品誰得相宜誰得相宜除却湘妃定洛妃  
枝頭止許棲幽鳥燕子來遲燕子來遲不見雲英

未嫁時

減字木蘭花

招友人遊湖

孤山之下雨中正好看花也  
待得晴時杏嫁梅娠綠滿  
枝空囊烏有三百青銅難貫酒  
亟典春衣莫待東君  
致政歸

憶秦娥

秋感

梧桐落秋來客睡何曾著何曾著萬家砧杵月明烏鵲  
人間信有風波惡紛紛世俗成輕薄成輕薄五陵衣  
馬少年同學

有憶

朱闌畔莫愁嬌小曾相見曾相見翠蛾羞斂半遮團扇  
畫梁依舊巢雙燕藏鴉幾度垂楊換垂楊換桃花臨  
水那時人面

春閨

春如繡銜泥燕子黃昏後黃昏後愛他雙影妬他雙宿  
匆匆過了梨花候池塘不耐東風驟東風驟吹將波  
影學人眉皺

清平樂

春怨

楊花飛雪蕩子心腸鐵恨殺嫦娥圓復缺不管人間離  
別怕簪碧玉搔頭粧成懶下朱樓樓上銜泥雙燕呢  
喃似替人愁



輦上故人有為余勸駕者作此詞謝之

鼠肝蟲臂總是君王賜一曲征歌千日醉管領鷗班鷺  
隊故人天上吹噓勸子重整簪裾只恐中山毛穎於  
今老不中書

阮郎歸

春閨

越鷗犀液試新茶困來眠碧紗夢中何事獨長嗟梅香  
猜著些呼女伴踏晴沙柳梢啼暮鴉繡裙偏愛合歡

花來生得似他

攤破浣溪紗

西溪訪陸處士作

三月楊梅正作花  
板橋歌側俯晴沙  
閒覓柴門無徑路  
柳陰遮  
燕子惚忙營社稷  
蜂兒辛苦坐官衙  
問着山翁都不識  
野人家

眼兒媚

憶故園作

朝來沽酒典春衣，梅子雨初肥。  
杜鵑言語，枝頭教誨，道不如歸。  
十年踪跡沙鷗是，負却舊漁磯。  
鄰翁相候，山間茅屋，松下柴扉。

西江月

索林鐵崖侍史絮鐵不見作此嘲之

閱盡古今俠女肝腸，誰得如他。  
兔家郎罷，太心多金屋，何須重鎖。  
羞說餘桃往事，憐卿勇過龐娥。  
千呼萬喚，出來麼？林曰：期期不可。  
林口吃故云

金瓶梅詞話卷之六  
卷六  
秋花有名粉茉莉者

姑射山頭冰雪仙人散作銀霞媽紅姹紫讓天斜畧似  
文君新寡最愛章江木本居然壓倒羣葩嬌香冷蕊  
較爭些婢學夫人其亞

無題

傾國先呈皓齒靈犀暗托瓜犀麝蘭香沁茗甌時中有  
醍醐妙理春筍纖纖半露燈前低斂蛾眉禪心果否  
絮粘泥珍重阿難戒體

舟中見麗人

淶水芙蓉掩映青蛾欲展還顰琉璃千頃碧無痕怎敵  
橫波一寸 畫舫搖搖近岸岸邊偷覷防嗔長年何幸  
得相親半晌輸他福分

錢唐門外作

白馬千羣浪湧銀山萬疊天高錢唐潮似廣陵濤近日  
潮聲草草 往昔綠陰黃鳥于今野水紅橋西陵松栢  
久蕭條何處孤墳蘇小

二男阿環日者家云長當學武三男阿端以五  
月五日生忽屆晬盤口號志喜

只合呼他豚犬漫誇圖畫麒麟與兒戲戴小綸巾果否  
提戈取印 莫學王家鎮惡爭如齊相田文敢期他日  
大吾門孝弟耕田本分

久客杭州歸雲間度歲兒輩競索衣帛作此自  
嘲

老去霜顛種種歸來繡襖重重辛盤銀燭畫堂中第一

生平好夢 爭學傅柑索棗挽鬚交問衰翁空囊更比  
少陵窮那有天吳紫鳳

醉花陰

閔園

雨餘天似柴窰碧修竹穿籬出滿地碎秋聲白鳥青蟲  
生長芙蓉國 森然奇鬼池邊石紅葉纏青壁屐齒竟  
忘歸醉倚層樓三弄楓林笛

南歌子

南園牡丹始開吳六益董蒼水過飲薄暮方歸  
碧沼看魚騰雕欄放鼠姑君來拍手唱烏烏恰好枝頭  
啼鳥喚提壺 嫩白全羞粉媽紅半點朱醉眠堪卧錦  
毬綸偏要戴花歸倩細君扶

浪淘沙

昭君套

宜伴鐵兜牟却在粧樓文姬遺製尚風流扶上雲鬟頻  
熨貼紫玉搔頭 臨鏡轉含羞笑展雙眸起來呵手戲



藏闔密語檀郎低附耳底是溫柔

秋旅

風雨十分驕怒似江潮愁來我欲睡鄉逃但織多言偏  
不允枕畔叨叨強半客僧寮琴劍蕭條一枝難穩愧  
鷓鴣來歲西牕須記取莫種芭蕉

揚子中流望金山北面

誰削玉嶙峋千尺雲根蛟龍深護海西門金碧樓臺青  
黛樹小李將軍雁影落紛紛喚起江豚鐘聲兩岸客

邊聞登陟不如遙望好倒影斜曛

湖上三舟圖成寄執玉奉常西樵吏部

何處覓星槎且住為佳張融岸上屋堪賒同在白鷗鄉  
裏宿迭作鄰家有約看朝霞每到棲鴉南屏寺外藕  
初花盪漿歸來驚宿鷺觸破窗紗

鷓鴣天

贈說書韓修齡

豹尾班中侍從頻滑稽似爾絕無倫投壺那得天顏笑

只為恢諧郭舍人  
楓欲落雁來賓  
蕪城明月恰逢君  
開元供奉今誰在  
抵掌雍門淚滿巾

賀相者陳我白生子

聞道明珠入掌中  
充閭佳氣靄融融  
君家妙手如唐舉  
摩頂何須寶誌公  
金作埒玉為驄  
鳳毛五色自超宗  
弄璋錯寫休辭罰  
試聽啼聲問阿翁

同人約看元墓梅花  
以雨不果返棹雲間  
阻風  
四日舟中撥悶戲呈  
吳仲徵廣文

鄧尉梅花二月天欲攜竹杖醉花邊無端甲子冥冥雨  
不為遊人巧作緣 三泖路九峰烟石尤風起纜難牽  
輕帆半幅如飛鳥羨殺東來鴨嘴船

題樊會公小像

曾向舟中看壁人金丸珠勒冶城春祇今老作青溪長  
猶是當時折角巾 姿卓犖骨嶙峋畫師摩詰是前身  
知君埋照饒深意新築糟丘號酒民

題佟壽民方伯三世圖

作礪為舟社稷臣  
衮衣應許近星辰  
黑頭宰相黃扉客  
曾是維摩座上人  
鏘劍佩握絲綸  
安排圖畫到麒麟  
夢回須記青蓮句  
金粟如來是後身

遣懷

咄咄書空喚奈何  
自憐身世轉蹉跎  
長卿已倦秋風客  
坡老休嗔春夢婆  
朝梵筭暮漁蓑  
閒中歲月易消磨  
誰言白髮無根蒂  
只為窮愁種得多

陳叔明行年七十有三邑宰高其誼聘為鄉飲

介賓固辭不就其殆隱君子之流歟

誰守柴門是野鷗花邊茶白竹間樓古人偏愛陶元亮  
祭酒咸推陳太丘九節杖一扁舟布衣焉敢謁諸侯  
老人未鯁何須祝且往前村飯犝牛

又

俛仰乾坤一草亭科頭箕踞眼還青休妨南郭先生睡  
不羨東吳處士星泥藥竈護花鈴春來蜂蝶共經營  
兒孫功課無他事熟讀龜蒙耒耜經

又

門外垂楊隱釣船  
醉來留客大床眠  
風前鐵笛誰三弄  
壁上雷琴剩一絃  
顏沃若色蕭然  
盟鷗狎鷺費周旋  
籠中歌鳥聲偏好  
辛苦教成十二年  
鳥名叫天知先生  
養有年縱之不  
去人曰此  
壽鳥也

虞美人

賦得遠遊長兒子

殊方流落頻生子  
舐犢真堪喜  
尋醫覓乳費商量  
何況

他年婚嫁為他忙 生長東吳同燕旅  
不解齊人語 故園猶有舊柴桑  
待得青春作伴好還鄉

看花作

朱朱粉粉東風面 一夜開將遍  
花神料得是鍼神 繡出枝枝葉葉一番新  
黃鸝似向風姨訴 莫把花枝妬  
韶家姊妹易相嗔 試看南枝如笑北枝顰

遣懷

一從勘破邯鄲夢 遇飲長酒痛醉鄉  
只道可藏愁 却被



塞鴻呼起又從頭  
吳頭楚尾經年寓岸上牽船住非  
關王粲怯登樓自是吾家家法善悲秋

過錫山秦園訪留仙太史不遇作

辟疆園傍春申曲翠壑噴哀玉畫橋宛轉客來稀驚起  
一雙鷓鴣破烟飛釣船空繫垂楊下興盡須歸也蔣  
家新釀不曾酤却笑酒盃也似故人疎

鵲橋仙

井蛙

草際持頤泥中嚙齒別號蟲中裸族一謳羣和為公乎  
偏則向人前怒目 雄踞東陂長吟下里宛矣公孫在  
蜀董生何事懶窺園看不耐汝曹邊幅

長安邸舍初罷稽勲作

鈞天在耳晨開闔闔空自葵心向日嵇康曾答巨源書  
道臣也不堪有七 玉珂雕馬莫來莫往盡是平生膠  
漆孝標著論一何愚笑勸百何曾諷一

雨中宿笑隱庵示笑魯和尚

沙鷗睡穩雨聲驚起竹裏雙扉開闔南屏一縷白雲生  
早失却雷峰殘塔青苔妨屐黃柑伴茗松老應同僧  
臘西風蕭瑟柁樓寒向彌勒龕中下榻

寓園海棠

東君忒巧調朱搓粉繡出紅霞幾幅朝來細雨一絲絲  
似妃子溫泉初沐風前欲語烟中如睡只合錦禽雙  
宿枝間啼罷不來巢燕燕說鶯鶯無福

五人墓

揚旗擊鼓斬蛟射虎頭  
顛碎黃麻天使鱗  
諸七首信豪  
雄笑當日一人而已  
華表崔巍松杉森  
肅壯士千秋  
不死從來忠義出  
屠沽慚愧殺乾兒  
義子

踏莎行

雁

楓落瀟湘雪深幽  
冀西風吹老蘆花  
穗搖衣時節却飛  
來一聲纜斷千行淚  
帶雨還飛飄零無次  
蕭蕭清影  
和雲墜郎邊莫道少  
書來長空寫盡相思  
字

虎丘試劍石

光淬芙蓉魂驚魑魅青苔石上媧皇淚自從雙劍作龍  
飛空聞白虎眠幽隧 歌舞方酣越人兵至水犀驚醒  
夫差醉鷓夷墓後館娃空屬鏤似比干將利

中調

臨江仙

曹顧菴歸自楚中聞余在白門不及晤而去留  
書為別賦此詞奉答

憶在勞勞亭上別吳江三弄丹楓洞庭西望水連空共  
誰過赤壁高唱大江東 準擬開樽還痛飲小樓同聽  
疎鐘布帆歸去似飛鴻寄將黃雀鮓須趁鯉魚風

艾石五兄納姬白門善解琴書攜之入蜀催粧  
賦此

桃葉桃根艷冶巫山巫峽嶙峋高唐雲雨昔曾聞賦才  
今宋玉臣夢果然真 十樣眉誇螺黛七絃琴拂龍唇  
薛濤箋寫洛川神小窓圖筆陣親學衛夫人

侄婦姜臨池最工故

云

贈少年客

韋曲城南天尺五，翩翩公子豪奢。  
小平津外綠楊斜。金鞍雄百騎，蠻鼓醉三挝。  
一擲梟盧輸百萬，吳鉤光閃龍蛇。  
春夜宿杜陵花，情人劉碧玉，俠客魯朱家。

蝶戀花

桃葉渡，舊用小舟亂流而濟，今易以橋，往來差便，而名實不副，慮往跡之湮也，作此詞。

一曲清淮圍畫閣桃葉桃根髻子新梳掠不畏風波江  
上作長篙自有王郎捉誰向津頭施畧約高架虹梁  
偃卧青龍角寄語黃姑依樣學填河不用勞烏鵲

相思鳥

兩兩文禽長並宿淺碧殷紅毛羽如新沐共命迦陵真  
眷屬離籠合用連枝木飛去銜花歸啄粟雄往雌來  
似戀黃金屋畢竟斑鳩鷹眼毒晴時相喚陰時逐

閨中秋月



恨殺廣寒宮裡兔闖入紗窓無計驅他去若是嫦娥憐  
妾苦只應長伴愁人住 無奈團圓纔十五漸漸虧來  
做出愁眉嫵說向天邊兒女語人間薄命儂和汝

旅月懷人

月去疎簾纔數尺烏鵲驚飛一片傷心白萬里故人關  
塞隔南樓誰弄梅花笛 蟋蟀燈前欺病客清影徘徊  
欲睡何由得墻角芭蕉風瑟瑟伊遮掩牕兒黑

送春

借問東君何所似，駘宕風流性格如。遊子纔過清明兼  
上巳，瞥然興盡思鄉里。萬樹嬌紅，千樹紫，那忍相拋  
便付東流水。春風也恐多情死，杜鵑聲裡潛歸矣。

唐多令

孤館

牕外雨淅淅涼颼，夏竹枝賴征鴻喚起。魂癡安得波斯  
千里鏡，重照見曉粧時。孤館被秋欺，啼蛩攪夢思。寫  
離愁，空費烏絲。縱有金針五色線，穿不起淚珠兒。

一剪梅

梅花

淺碧深紅擁素裳  
楚楚晨粧澹澹殘  
粧霜姨雪姊伴昏  
黃月在迴廊影在迴廊  
寂寞孤山處士莊  
漠漠湖光  
剪剪雲光思量誰得配  
孤芳風裊蘭香篆  
裊沉香

梨花

靜女仙姝澹不羣  
猜作湘君喚作文  
君軟風嬌雨護香  
溫朝展眉痕夕帶啼痕  
欲謝還開映水紋  
開是停雲

謝是行雲幾枝斜倚綠楊村鶯也銷魂燕也銷魂

思家作

飄泊東南劇可憐朝採菱船暮打魚船愁中看遍好山  
川鶯脰湖邊罨畫溪邊問余何日賦歸田說道今年  
又早明年故園消息久茫然春燕來前秋燕來前

破陣子

關山道中

拔地千盤深黑插天一線青冥行旅遠從魚貫入樵牧

深穿虎穴行高高秋月明  
半紫半紅山樹如歌如哭  
泉聲六月陰崖殘雪在千騎宵征畫角清丹青似李成

舊雨來

自度曲

客金陵雨中作

曾記當年雨後門前冠蓋客一何多銀燭西窓螢火亂  
聽枯荷直到晴時方去濕鳴珂今日雨聲猶昨蕭條  
三徑裏有誰過料得故人無疾病却因何只把天公埋  
怨太湯沲

青玉案

何匡山齋中牡丹將放作此詞問之兼索其酒  
玉環飛燕方嬌小看葉葉輕霞裊蛺蝶蜂兒忙在曉帶  
露含啼臨風偷笑莫待都開了花神欲酹須醇醪最  
愛君家麴生好蚤起衣裳渾欲倒畫欄憑處提壺頻喚  
願作花間鳥

感皇恩

寬繫二年一朝解網感荷

天恩歌以代泣時癸卯十一月朔三日也

雪窖與冰天孤臣泣血魚鱗沉沉隔雙闕修羅剗滿等  
到烏頭如雪九重消息好皋陶曰 禧下騶虞雞竿載  
揭喜極沾巾轉嗚咽妻孥相告今日鶴鳴于垤黃梁剛  
夢醒炊還熟

千秋歲

為吳門袁生題霜哺篇冊

袁生至孝鄉國入爭道身既隱親將耄駕離衣膝下瑞

映金光草五十載慈顏今日方成笑  
殊有超宗肖骨  
相生來好竹馬戲斑衣導驂駟上苑圭璧登天廟羨  
只羨重堂百歲丸熊教

離亭燕

題胡履泰小像

野鶴翩翩閒雅風度如君瀟灑白眼科頭天地外此意  
無人知者何處覓行踪長在遠公蓮社 孝筍曾生堂  
下旦晚徵書來也布襪青鞋遊五嶽懶問向平婚嫁若



箇寫丹青應是將軍曹霸

風入松

淳于棼墓

大槐安國舊邦基蟻蛭尚累累麒麟高塚祁連象繁華  
夢一枕龜茲為問秦樓公主瓊簫曾否相隨 朱旛皂  
蓋畫熊旗千里罷征鞞策勳帶礪今何在羊開府身後  
同悲吾欲題君隧道南柯太守之碑

訪張瑤星於松風閣不遇

雨花臺畔訪柴荆  
匹練大江橫  
鍾山紫翠斜陽外  
虬龍影幾陣  
松聲曾共廬  
山高袖小樓  
明月吹笙短筇重  
過石頭城懷舊  
不勝情  
徵君結制棲霞寺  
梧桐老白鶴  
相迎為道二鄉居士來  
尋三影先生

千秋歲引

題長松柱石圖為李含馥運長壽

怪石眠雲孤松偃蓋  
亭亭千尺連青靄  
五粒曾霑仙掌  
露一拳欲下南宮拜  
謫仙人原是李蟠根大  
伊吕功

名方未艾何事丹砂勾漏外  
鄧禹封侯喜將屆夢松之  
占今驗矣黑頭堪羨風雲會  
紫泥書丹山鳳銜來快

滿路花

胭脂井

紅牙歌玉樹翠袖翻金縷  
臨春梳洗罷調鸚鵡陳家狎  
客慣把江山賭樓船天塹渡  
牀下軍書錦箋催寫新句  
舊宮晉井欄外青苔古  
明眸秋水綠為黃土  
海棠花落一片胭脂雨  
環珮歸何處泉下芳魂至今遺恨擒虎

意難忘

為施校書宛西作

洗盡鉛華記苧蘿西畔曾浣溪紗徵歌鶯語滑學舞燕  
飛斜攜暮雨掩朝霞別館貯嬌娃采蓮歌魂銷千載何  
況夫差 嬋娟偏在君家羨朱樓罨畫楊柳藏鴉鷓弦  
時一弄羯鼓醉三過無限恨向梅花清淚染琵琶待學  
他鷓夷少伯共泛仙槎

十五家詞卷六